

## UVODNIK

**P**red Vama je, cijenjeni čitatelji, dvedesetpeti broj "Znakova vremena". I ovaj broj Vam nudi raznovrsne i zanimljive priloge. Prvi odjeljak i ovaj put posvećujemo jednom znamenitom bošnjačkom učenjaku. Riječ je o uglednom sarajevskom imamu, hatibu, muallimu i mutesavifu Šejhu Fejzulah ef. Hadžibajriću. Njegov doprinos razvoju teorijskog i praktičnog sufizma u Bosni i Hercegovini, s jedne, te povezivanju tekija sa institucijama Islamske zajednice, s druge strane, je nemjerljiv. Zato će Šejh Hadžibajrić u svojim brojnim tekstovima i dersovima više puta za sebe kazati kako je zaljubljenik u *šeri'at* i *haqiqat*. Time je Šejh Fejzulah ef. svojim učenicima htio kazati da se cjelina islamske spoznaje ne može niti smije ograničavati isključivo na područje prava i rituala, ali isto tako da se do najvišeg stupnja duhovne spoznaje (*haqiqat*) ne može doći bez odličnoga poznavanja i bezuslovnoga slijeđenja *Šeri'ata*.

U drugoj rubrici *Religijske teme* A. Fatić nastoji ponuditi jedan metodološki okvir za proučavanje islama u Bosni danas, polazeći od pet temeljnih faktora koji takav istraživački pristup naprosto determiniraju.

Potom slijedi odjeljak u kojemu se kritički razmatraju koncept "Novoga regionalizma" na Bliskom istoku, koji predstavlja svojevrsnu reakciju ili odgovor na fenomen sveopće globalizacije svijeta (Muhammed Reza Dahširil), pitanja vezana za američku i evropsku politiku na Bliskome istoku (Ahmed Naghibzadeh), te pitanje odnosa Evrope prema Balkanu, posebno prema Bosni u okolnostima postkomunizma i širenja zapadne civilizacije na Istok (I. Grbo).

U rubrici *Ogledi* A. Šljivo piše o degradaciji novinarske profesije u ratu. U tom sklopu ona pažnju čitatelja posebno zadržava na političkoj i ideološkoj zloupotrebi elektronskih i pisanih medija u pripremanju i izvođenju agresije na Bosnu i Hercegovinu.

Potom slijedi odjeljak *Ekološke teme* u kojemu se govori o Geteovom razumijevanju prirode i o nužnosti očuvanja prirodnog poretka stvari odnosno čovjekove harmonije sa prirodnim svijetom.

Posljednji odjeljak rezervisan je za poduži tekst Nusreta Čole u kojemu se na dokumentiran način govori o doprinosu Abdullaha Bosnevija razvoju sufijske literature, a sasvim posebno razvoju sufijske prakse halvetijskoga derviškog reda.

Ovaj broj završavamo prikazima knjiga te podsjećanjem na rahmetli Kasima Prohića. Božo Rudež piše o knjizi *Kina od nebeskog carstva do naših dana* autora Ive Dragičevića, Hasnija Muratagić-Tuna nam predstavlja najnoviji *Prijevod Kur'ana* profesora Esada Durakovića, a Bećir Macić predstavlja knjigu *Psihološke dimenzije genocida*, koju je napisao prof. Ismet Dizdarević.

U rubrici *In memoriam* profesorica Fatima Lačević, u povodu dvedeset godina njegova preseljenja na drugi svijet, evocira uspomene na velikog bosanskohercegovačkog filozofa estetičara Kasima Prohića ◆

**Adnan Silajdžić**